



**Covid-19 we' tin:
yang: myid' myo"
ra" dao: myid: Jham**

**1. Covid-19 Nogug; Cid'
we' tin" ra" dao: myid:
jham**

Covid-19 we' tin: mung: myid' myo" ra" dao: myid: jham

Covid-19 nogug; cid' we' tin" ra" dao: myid: jham

1. Covid-19 nogug; cid' thug' nae" lao" khora" akhyo jham re ba: gyo" to: ca" i"?

Khora" nogug; cid' thug' byid: nae" ga" ru shi" ba qo: ra". Mungkan: Qao" Zin" Mo,Thau: (WHO) mae" aso: zhaug' to" ra" nogug; cid' jham reza: thug' gai: ra". Aijham wa –

- (1) Byitin: Mang: (British) we' India Mang: mae" kad' thug' ra" Covishield,
- (2) Byitin: mae" kad' thug' ra" AstraZeneca,
- (3) America mae" kad' thug' ra" Pfizer, Moderna, Janssen,
- (4) Laha mang: mae" kad' thug' ra" Sinopharm (Beijing Institute of Biological Products Co-Ltd), CoronaVac (Sinovac ga: myo: phyao: ba: gyo" to" ra") jham ngad: ra".

Sinopharm (BIBP) we' Sinovac mocid' jham re Mungkan: Qao" Zin" Mo,Thau: (WHO) wa yhau:gyin: khyag khyag ayo, re ci yhung: nae" qhid' mae" akhang" byid' rure 2021 zin May khye' we' June khye' mae ta" thug' to: va". **Laha mang: thug' Sinopharm (Wuhan Institute of Biological Products Co Ltd) we' India mang: thug' Covaxin nogug; cid' jham re wa Mungkan: Qao" Zin" Mo,Thau: (WHO) khyo" ca: qu" na: ra" ayo, ngad mung: aso: mazhaug' to: shi" re ngad:.**

Binthao nogug; cid' nho: azhao" lam gai magari – vintang: shaung: to: mato: - mocid' thug' nae" qhid' mae" vintang: nyhang" manyhang" – mocid' thug' byid: nae" mo, ba jhao khyo mae lam gai magari jham re myid: ca: qu" qo: ra".

2. Covid-19 nogug; cid' bin: thug' thao yobam (%) khonho" gug; i"?

Mungkan: Qao" Zin" Mo,Thau: (WHO) aso: zhaug' to" ra" Covid-19 nogug; cid' jham nho: gug byid' ra" yobam (%) jham wa.

	Covid-19 Nogug; Cid' Jham	Covid-19 Ave, Khamzo" Rure Gug Byid' Qam:	Thin: Ra" Covid-19 Gug Byid' Qam:
1.	Pfizer by BioNtech Comirnaty	91.3 %	95.3 %
2.	AstraZeneca-University of Oxford by SK Bio	76 %	85 %

	Covid-19 Nogug; Cid' Jham	Covid-19 Ave, Khamzo" Rure Gug Byid' Qam:	Thin: Ra" Covid-19 Gug Byid' Qam:
3.	Covishield by SII	66.7 %	92 %
4.	Janssen by Johnson & Johnson	72 %	86 %
5.	Moderna	>90 %	>95 %
6.	Sinopharm by Beijing Bio- Institute of Biological Products Co Ltd	79 %	Nyang" pug; ca: to" ru majo, shi:
7.	CoronaVac (Sinovac) by Sino- vac Biotech Ltd.	51 %	100 %

* Nogug; cid jham wa thin: ra" covid' gau" de, khyo re azhao" dalam: joe" gug byid' ru za: angad: no de, yao: made, lo: ein:ru mangad' mathao nugug; cid' bin: thug' thao ngad yang: re: Covid-19 gug; gam khyo shid' khyo jham ngad: ra" Nhad' Nho Nghoe' te' ra" khyo – Sab'pya: we' qhid' ci yhung: mung: second 20 lo, cid' khyo – byu mo, thau: jham re jao" lha" ra" khyo jham re wa xo' yang: cao" ye: ca" shi"

3. **Covid-19 Nogug; Cid' re Khoru" ru" mo, gai: thug' i"?**

Covid-19nogug; cid're kao (18)zin atho' mae" bao: myo: phyao: qo" thug' ngad yang: re:

- Bug; gau" de, khyo je: gai: boe" ra" Qao" Zin" Khyo mau" vin mo, we'
- Covid-19 boe" lao" gyai gai: xo: lo: ra" mo, (Kao qi: va" mo, - Gatau: No anhae: bo mo,) jham re akhyad to: thug' byid: nae" qhid' mae" Ba Jhao Lam: Lang" mo, juyi byid' to" ako".
- Sa: do, - ig' cug – Qaogao jhe' – Kheim – Sang: - Zhad' – ru" ra"no daja: ja" yo, qhang no bo ngad yang: re: no yo: na: ra" mo, (Dao: tau" HIV bug; bo mung: ART mocid' shaug' na mo,) wa nogug; cid' thug' gai: ra".

4. **Covid-19 Nogug; cid' khoru" mo, magari: thug' i"?**

- Ana" na" Covid-19 no no: na mo, (mng) Covid-19 ein: gai: ta" naeru" ra" no no: na mo,
- Kao 12 zin o mae" zoshao qe (Pfizer Covid-19 nogug; cid' mae" lai mung: katau: Covid-19 nogug; jham re 18 zin o mae" mo, magari: thug')
- Nogug; cid' mae bo: ra" Dad (ဝ၁ဝ၁) daja: ja: we' madau: ra" no daja: ja: qo" mo,
- Lai: lo yo, nogug; cid' daja: ja: thug' qu" au: madau: ra" ru boe" qu" mo,
- Zoshao: gaung ngad: ra" myhi" zang qe (nogug; cid' daqhae: qhid' mae") nogug; cid' magari: thug'

Dad' madau: ra" no jo; ra" mo, wa nogug; cid' mathug' shire mocid' thug' byid: nae" Qao" Zin" Khyo qu" gam yang we' shi" jho" qham ca".

Zoshao: gaung ngad: ra" myhi" zang qe wa Covid-19 noboe" lao" wa gyai thin sho' boe" ba: ru we' zogaung dao mae re: katau maboe" ga: ra" ru jham gai: ba: boe" lo ra" mathao je: lao" thug' byid: ca" ngad yang: re: nogug; cid' daqhae: wa zogaung ngad mo, qhid' mae" lam ga" ra" akhyo jham majo, shi" yang: zogaung ngad mo, nogug; cid' thug' nae" ga: lao" nogug; cid' thug' yang: gai: boe" ra" gai: ru jham magai: ru jham re myid; lag; qu" yang: ba jhao lam: lang" ra" Qao" Zin" Khyo qu" gam mo, we' jhao" qham yang: gai: thug' ra".

5. **Covid-19 Nogug; Cid' thug' lao" qo" yu nae" gai: ru jham magai: ru jham re ba nug; ra".**

Ca: qho: qhug' ra" aphyid khyo" ga" re nogug; cid' re joe: byang" thug' ra" mathao o mae qhu" to" ra" akyu" jham qo" yu nhao: ra".

- ✓ Covid-19 no mathao xao sho' no: ru we' shid: ra" ru khyo jham re nang" lo" nhao: ra".
- ✓ Covid-19 no gau" de, khyo re nang" lo" nhao: ra".
- ✓ Covid-19 no aja: ja: mae" gug; gam khyo byid' ra".

Ngad yang: re: khora" nogug; cid' re: no re yobam (100%) byang" sho' maqo" gug; gam byid' ra" mathao kao – no anhae: qo" maqo" – qao"zin" qam: ru"ra" jham mae cao" yang: gug; gam khyo re phyo' mung: bug; gau" de; ra" khyo (Breakthrough infection) boe" ba: ra". Nogug; cid' re joe: loe" sho' thug' to: yang: re: nang" pyo: wa no gai: boe" ra". Airu re nogug; cid' ra" gug; gam khyo re phyo' yang: bug; gau" de; re (Vaccine breakthrough cases) ein: ru ngad: ra".

Aira" mathao nogug; cid' joe: byang" lang byang" sho' bin thug' thao re: yham sang: gaung jao" lha" khyo ngad: ra" nhag' nho nghoe' te' ru – lo, re dazab makyo cid' ru – (6) pe: kyo mung: na ru – byu mo, thau: jham re jao" lha" ru jham re xo' mung: cao" ye: ca" ra"

Magai: ru ein: nae" wa nogug; cid' bin: thug' jao" no: ru – myaung" ru – gaung na mapyo" ru – mocid' thug' khu mae no: ru – ne ne mung mung: qe" ru jham boe" ba: ra". Myo: phyao: wa lam" maxo loza: (2) ba thao yo: lo" ru the' myao: ra".

6. No-gug; cid' thug' re kad' ca" nae" akhyo jham ba nug; ra".

Nogug; cid' mathug' shire

- Nyang" za: thang: yu mung: qao" qao" boe" na qo: ra". (ma byan: lao" wa nogug; cid' magari: thug' ngad: ra".)
- Adao: dapye khyo" wa yhamsang shaug' lo,zo" ngad: ra" mocid' jham katau phyid' to: maqo.
- Gaung khyao qam: nang: nhao: ra" Sati"rad' (Steroid) mocid' jham we' Maung mocid' jham shaug' na: re ngad: lao" wa, Phoya Zug; (Doctor) we' no' mae" jho" ta" qham: to: ca".
- No anhae: jo; ru ngad ngad mocid' daja: ja: xo' xo' shaug' na: ru jo, ngad ngad nogug; cid' thug' byid: nae" Qao" Zin" Khyo gun caung byid: yaug re shi" ba nhao wa,.

Nogug; Cid' mathug' shi" yo, we' bin: thug' thao yo,

- Gaung khyo re akhyo" byid' ra" zo: shaug' - o: pho' – shi: jham re dau nyang sho' zo: wa,.
- Ig magari: shaug'. (Qid dad' re kin: nho: ru we' daug; ru re je: xo nhao: ra" mathao ngad:)
- Dalhang re; mazo" qu" ra" zo: ve re zo" qu" ru – dalhang re: maci: qu" ra" gaung khyao shaung yhaung" zai re ci: qu" ru jham magari: kad' (Dad' madau: ru boe" thug' lo lao" ai jham: mathao la, nogug; cid' mathao la, ba: gyo: qug' ra" mathao ngad:)

Nogug; Cid' bin: thug' thao

- Mocid' bin: thug' thao re: mocid' thug' byid' ra" jo,qo mae minute (30) kho zaung: to: qo shi" ra". (nogug; cid' we' dad' madau: ra" ave, jham ngad: ra" sa: qam: dalhang: de gyo" byaug; ra" ru – sang: byae: ru phyad: lo: ru – so' she jhe' lo: ru – gaung phan" lo: ru – ane pyaug' pyaug' thug' lo: ru – myo, khung: qae" lo: ru jham boe" thug' lo lao" phyad phyad pho ya khyo qo" yu nae" qhid' mae" ngad:)
- Nogug; cid' thug' ra" jo,qo mae maqae" lo nae" qhid' mae" we' no: ra" khyo khyam" sa nae" tau: qid khai" hab' byid: gai: ra".
- Gai: boe" re yham mae shid' da ba no" yu wa, . Yab gyi: gyi: yab wa, .
- Gyai myaung: sho' gaung khyao dau lab: ra" ja: (Dao: tau": qid qhe' qhe' ru – khyid lhin" zaung: ru – tao" ru – ala: vo; ru – nhai: baung: pag' ru – qo, mug' be; ru – nhai: baung: be; ru jham) jham re mocid' bin: thug' thao (7) ba akhyo" jao" lha" wa, .

7. Covid-19 Nogug; cid' khomae thug' zai i'?

Lam gai: ra" Nogug; cid' re qo" yu nae" tau:

- Gyang" ra" Covid' nogug; cid' re yu: vhao" to" khyo qo qo" yu: ra" mo, thui: - Company jham
- Nogug; cid' jham re tu" ka" to" ra" laung ngin" azhao" khug mae vintang: shaung: to" ru
- Vintang: celo: ru
- Moid' thug' au: re: nogug; cid' nyhang" shaung: ra" cao" khyao re vintang: cao" ru
- Nogug; cid' we' tin: mung: nyang" za: mho" xeim: to" ra" mo, na: ra" ru
- Lam ga" ra" Nogug; cid' thug' byid' ra" Qao" Zin" Khyo gun caung mo, na: ra" jo, qo khaung: she nogug; cid' re thug' gai: ra". Airu: mangad: re wa nogug; cid' ra" akyu" byang" sho' magari: qo" ngad: ra".

8. Covid-19 nogug; cid' nho: qam: so' wa khoyo, joe" kham: i'?

Covid-19 nogug; cid' jham wa ana" na" aqhida kad' thug' to" ru ngad: ra" mathao – khoyo, khoau: joe" kham nae" ein: ra" rure khyag' dang dang za: maqo" ta" shi: - pug; ca: na shi" ra" ayo, ngad: ra".

9. Laha mang: thug' Sinopharm – CoronaVac (Sinovac) we' India mang: thug' Covishield jham akhyo.

	Sinopharm (BBIBP-CorV)	CoronaVac (Sinovac)	Covishield
Kad' Thug' Ra" Company	Beijing Institute of Biological Products Co-Ltd	Sinovac Life Sciences Co., Ltd	Serum Institute of India Pvt Ltd (AstraZeneca Company we' Oxford Ginbagam Jung daga" kad')
Nogug; Cid' akhyo	Bug; nho: qam: phoe: byaug sho' kad' thug' to" ru	Bug; nho: qam: phoe: byaug sho' kad' thug' to" ru (Inactivated Virus)	No gau" te' ra" bug; mae" kad' thug' to" ru (viral vector)
Caung: Shaung: to: nae" laung so: azhao"	2-8 degree Celsius agyo: (Palin" dao mae laung so: azhao" ka" qu" nae" khyo bo:)	2-8 degree Celsius agyo:	2-8 degree Celsius agyo:

	Sinopharm (BBIBP-CorV)	CoronaVac (Sinovac)	Covishield
Thug' ca" ra" lhang	(2) lhang [Saoqhid' lhang bin: thug' thao (3) dug no: mae" (4) dug no: agyo: mae (2) lhang: ein: lhang re thug' zai]	(2) lhang [Saoqhid' lhang bin: thug' thao (2) dug no: mae" (4) dug no: agyo: mae (2) lhang: ein: lhang re thug' zai]	(2) lhang [Saoqhid' lhang bin: thug' thao (4) dug no: mae" (6) dug no: agyo: (mng) (8) dug no: mae" (12) dug no: agyo: mae (2) lhang: ein: lhang re thug' zai]
No ave, jham kham zo" ra" mae" qo" gug; gam byid' ra" qam" azhao"	79% {(2) lhang ein: lhang bin: thug' thao (14) ba mae" qhid mung:}	51% {(2) lhang ein: lhang bin: thug' thao (14) ba mae" qhid mung:}	66.7 %
Xo: ra" Covid re gug; gam byid' ra" qam: azhao"	Pug; ca: to" ru majo, shi:	100%	92%
Mungkan: Qao" Zin" Khyo: Mo, Thau (WHO) mae" yhau: gyin: khyad khyad ci yhung: akhang"	Akhang" byid: va" (7th May, 2021)	Akhang" byid: va" (1st May, 2021)	Akhang" byid: va" (16th February, 2021)
Gatau ba ca" ra" akhyo jham	<ul style="list-style-type: none"> • Kao (18) atho' mae" mo, za: agai: thug' • Nug' jhaug' myhi" zang qere gai: thug' • Zogaung myhi" zang qe qhid' mae" wa pug, ca: ra" aphyid maqo" shi" ra" mathao Zogaung myhi" zang qere thug' nae" ga: lao" qo" yu nae" gai khyo we' magari khyo re tau" qu" yang: thug' zai. 		

Sinopharm nogug; cid' re saoqhid' lhang bin: thug' mung: (3) dug, no: mabyang" shire (2) lhang ein: lhang re thug' lao" thao dalhang thug' maqo lo:. (Mng) (2) lhang ein: lhang re (4) dug, no: tho' lai lao" re: thug' nae" gai: boe" ra" yo, phyad phyad lam" mamyao" lo: thug' yu ca" ra". Nogug; cid' re joe: loe" sho' (2) lhang thug' nae" qhid' mae" ba jhao lam: lang" mo, juyi byid' to: ko" ra".

* Atho' mae qhu" to" ra" nugug; cid' jham re ayo, khonho" kyo yang: thug' re je: gai: thao" ngad nae" ga" ru re jham" qu" ca: qu" na: ra" ayo, ngad: ra". Ana" lo, qaug the' myao: ba: ra" khyo" ngad: re Covishield nogug; cid' re saoqhid' lhang we' (2) lhang ein: lhang re (8) – (12) dug no: kyo mung: gai: thug' khyo" ta" to: ko" ra". Lama: mae" (12) dug no: lai: byaug ngad yang: re: aqhid' mae" dam: thug' maqo lo: (2) lhang: ein: lhang re gai: thug' ga: mho: to" ako". Yhamsang na: ra" jo, qo mae" cao" yang: nogug; cid' qo" yu khyo we' nogug; cid' thug' byid; mo, ta" ra" khyo" thug' yu gai: ra".

10. Covid'-19 no bin: boe" va" lao" wa nogug; cid' mathug' lo: na qo: i"?

Covid-19 no bin: boe" ngad yang: re: nogug; cid' mathug' lo: magai: na. Pe" mung: ga" re no dam: gai: lo thao no bug; re khoau: joe" qo" gug byid' na zai ga" ru ayo, re khyad' maqo" ba ga: ba jhao lam: lang" mo, ta" to" ako". Boe" nae" nang: ngad yang: re: no mae" dam: gai: lo, mo, re Covid-19 no bug; dam: gau" de, ba shi" re ngad:. Pug; paui ca: qhug' ra" khyo" ga" re no mae" dam: gai: lo mo, nogug; cid' thug' re gug; gam qam: je: qi" lo ko" rure the' myao: ra".

11. Covid-19 bin: boe" va" mo, khonho" myao" lao" she nogug; cid' gai: thug' nae" i"?

Covid-19 nokham zo: va" mo, wa nobug; ave, gai: yo: lo mung: su geje re magai: gau" de, nhao lo" ra" ayo, re.

- Yu" yu" ave, za: kham zo: mo, wa nobug; ave, khamzo" qhid' mae" (10) ba myo" + gaung laung gai: ra" thao: ba we'
- Xo: ra" ave, khamzo: mo, wa nobug; ave, no: qhid; ra" mae" (20) ba myao" re Covid-19 nogug; cid' yegai: thug' ra".
- Sa: phyu gyang: we' ya mo, wa bana (90) lai thao she, nogug; cid' gai: thug' ra".

12. Covid-19 nogug; cid' joe: loe" sho' lhang byang" bin: thug' thao nogug; qam: qo" maqo" ga" ru re ca: qu" zai yao (Antibody test kid) we' gai: ca: qu" i"?

Magai: ca: qu". Nogug; cid' bin: thug' thao nogug; qam: qo" maqo" re ba nae" qhid' mae" ca: qu" zai yao (Antibody test kid) we' ca: qu" ra" khyo re ba jhao lam: lang" mo, ta" to" khyo majo, ngad: ra". Aira" zai yao re Covid-19 noboe" qu" maboe" qu" ga" ru re ca: ru" nae" qhid' mae" za: ci yhung" ru ngad:.

13. Covid-19 nogug; cid' soqhid' lang bin: thug' mung: (2) lhang: ein: lhang thug' nae" ayo, joe" ra" au: Covid-19 no ave, jham (gaung laung – khyauung: zhug' zhug' – nhe' byug' byug') boe" na: re mocid' gai: thug' i"?

Nobug; ave, jham boe" na: ra" ayo, mae" Covid-19 nogug; cid' magai: thug'. Nobug; ave, gai shao" lo" lao" she, Covid-19 nogug; cid' yegai: thug' yu: ra".

Covid-19 ave, khamzo: mung: nogug; cid' thug' nae" tau: lao" ca" ra" ayo, we' tin: yang aso: (11) re nghe' wa,.

14. Covid-19 nogug; cid' saoqhid' lhang bin: thug' to" au: Covid-19 boe" mung: gai: gai: byaug thao (2) lhang ein: nae" lhang gai: thug' i"?

Nogug; cid' shidhang ein: nae" lhang gai: thug' ra". La,ma: mae" nyhao: mae Covid-19 ave, jham kham zo" khyo jo; re Covid-19 nogug; cid' thug' nae" khyo re ba nae" tau: aso: (11) re nghe' wa,.

15. Kao (60) zin atho' mae" mo, sang: - kheim – zhad' – sa: do, - lg' cuk no qo" mo, (mng) no anhae: daja: ja: qo" mo, Covid-19 nogug; cid' thug' ngad: re khoru" ra" magai khyo jham boe" lo ba: laug? Nogug; cid' thug' gai mathug' gai ba nug; ra".

Sang: - kheim – zhad' – sa: do, - lg' cuk no qo" mo, za: mangad: kao (65) zin atho' ngad mo, mae Covid-19 no gau" de; qhug' ngad: re no re gyai xo sho' gai khamzo" ra" mathao yao: bam re je: akyag to: thug' byid: ca" ra" khyo Mungkan: Qao" Zin" Mo,thai: (WHO) wa juyi byid' to" ra". Aira" mathao nogug; cid' thug' nae" akhang" qo" lao" wa joe" joe" yethug' wa, . Nogug; cid' mathug' shire mocid' thug' byid; nae" ra" Qao" Zin" khyo caung gam byid; mo, re nyhao: mae gatau: no anhae: jo; rure shi" ta" shid' khyo: wa, .

Nogug; cid' thug' ra" mathao mocid' thug' ra" jo,qo mae no: ra" khyo – qae" ra" khyo – no: ra" ru jham re su gaje boe" ru we' dakhyo: gai: boe" ra". Nyhao: mae jo; ra" gatau: no anhae: rere: vintang: ya: na nae" yhau:gyin" ra".

16. HIV bug; bo mo, we' ART mocid' shaug' na mo, re Covid-19 nogug; cid' thug' gai mathug' gai ba nug; ra".

Covid-19 nogug; cid' myo: phyao: re HIV no bo mo, mavai" re za: jham" qu" to" ru ngad:. Pug; paui: ca: ra" khyo majab byang" shi: ngad yang: re: ana" lo, qaug Mungkan: Qao" Zin" Mo,thai: mae" aso: zhaug' to" ra" nogug; cid' jham wa HIV no bo mo, qhid' mae" re: gai: ga: ta" to" ra". Binmung: Covid-19 nogug; cid' jham wa Covid bug adai re maci: yhung" to" ra" mathao qam: nhang" na: ra" mo, mae re: nogug; cid' mathao no gau" de, qhug' ra" khyo jham majo, ga: ta" to" ako". Covid-19 nogug; cid' we' ART mocid' shid'

lam: re: dalam: we' dalam: aqug; aqae" majho" boe" nhao: ra" mathao Covid-19 nogug; cid' bin: thug' thao re: ART mocid' jham re gai: xo' shaug' ra". Myid; qu" ke' qu" re wa CD4 (CD4 count) nang" na: ra" gaungkhyao qo" kham: qam: nang" na mo, jhao" wa Covid-19 nogug; cid' dao mae gaung khyao qo" kham: qam" ra" tug' phaung' ra" khyo nhang: ba: ga: ngad yang: re: aira" akhyo we' tin: mung: yang: wa ana" joe" qug' myo: ra" akhyo majo, shi:. Mung"dan: daqhae: mae wa CD4 (CD4 count) 200/cube millimeter o nhang" na mo, re je: akyag to: mung: nogug; cid' thug' byid: ca" ra" mo; japhin: mae ke' to" ako". Airu" ra" gaung khyao qo" kham: qam: nang: mo, we' gatau: no anhae: bo mo, mae Covid-19 noloboe" lao" gyai gai: xo: ra" mathao ai bam re je: akhyag to: mung: Covid-19 nogug; cid' thug' byid: ca" ga: ba jhao lam: lang" mo, ta" to" ako".

17. Zoshao khyo" mocid' shaug' na: re ngad: lao" Covid-19 nogug; cid' gai: thug' i"? Mocid' bin: thug' thao khoau: she, Zoshao khyo" mocid' dam: gai: xo' shaug'.

Adao: dapye khyo" ta" gelang: ga: lao" wa zoshao khyo" mocid' shaug' na mo, re: Covid-19 nogug; cid' gai: thug' ra" khyo ba jhao lam: lang" mo, ta" to" ako". Ngad yang: re: nogug; cid' mathug' shire mocid' thug' byid; nae" ra" Qao" Zin" khyo caung gam byid; mo, we' shi" jho" ta" qham qo: ra".

Nogug; cid' daqhae: mae wa sa: khai: nhao: ra" akhyo jham jo; rure the' myao: ra". UK mung"dan: mae kad' ra" pug paui ca aphyid mae nogug; cid' thug' ra" byulam: tig shid' yo (20,000,000) mae (79) yang wa sa: khai" ra" khyo boe" mung: (19) yang wa shid: byaug; rure the' myao: ra".

Nogug; cid' we' matin: lo: zoshao khyo" mocid' shaug' mo, mae re: sa: khai" ra" khyo dajhid' dazo: gai: jo;. Zoshao khyo" mocid' mashaug' ra" myiqe: mae wa (10,000) yang mae (2) yang - zoshao khyo" mocid' shaug' mo, mae wa(10,000) yang mae (5) yang mae" (10) yang kho gai: jo; ra". Cera" the' myao khyo jham wa Covid-19 no mae the' myao: ra" jham mangad:.

18. Covid-19 nogug; cid' thug' re zoshao magai: qo" lo: ga" re dang: i"?"

Madang ngad: ra". Lo, qaug Mungkan: Qao" Zin" Mo,thau: mae" aso: zhaug' to" ra" Covid-19 nogug; cid' jham wa zoshao de, nae" ra" akhyo jham re pe" aqug; aqae" mabyid:

19. Covid-19 nogug; cid' thug' mung: zoshao gai: yu: i"?"

Gai: yu: ra". Covid' nogug; cid' jham wa zoshao yu nae" mae aqug; aqae" boe" nhao: ga" ra" sagso: jham majo,. Nogug; cid' thug' bin thao aqug; aqae" boe" lo nae" sang: khao:

mung: zoshao made, sho' re: gatau makad' ca:. Australia mang: mae qho: ca: qu" ra" aphyid wa ana" joe" Covid-19 nogug; cid' mathao aungkhug; zoshao we' zoshao yu: ra" khyo mae aqug; aqae" zai" boe" ra" khyo mathe' myao shi: ga: ta" ako". Binthao Zoshao gaung mae re: gatau aqug; aqae" boe" nhao: ra" akhyo jham pe" mathe' myao: ra" tho' maga" nogug; cid' thug' to" ra" mathao Covid yang boe" ba: ra" zoshao ashid khau: ra" jham rere: nang" lo" nhao: ra".

20. Zoshao: gaung ngad: ra" myhi" zang qe Covid-19 nogug; cid' gai: thug' i"?
Zoshao: gaung ngad mo, wa khoru" ra" nogug; cid' re khyin: thug' ca" i"?

Zoshao: gaung ngad: ra" myhi" zang qe Covid-19 boe" lao" gyai xo sho' gai: no: ru we' zoshao: gaung we' tin" ra" gatau: aqug; aqae" gai: boe" ba: ra" mathao akhyag to: thug' byid; ca" ra" khyo bajhao lam: lang" mo, juyi byid' to" ako". Ngad yang: re: nogug; cid' myo: phyao: mae Zoshao: gaung ngad mo, qhid' mae" lam ga" ra" pug; pau ca: qu" khyo maqo" shi" ra" matho zoshao: gaung ngad mo, nogug; cid' thug' nae" ga: lao" gai: ru we' magari: ru jham re myid sun" qu" yang: ba jhao: ra" Qao" Zin" Khyo qu" gam mo, we' phyo" qu" yang: thug' ca" ra".

21. Nug' jhaug' myhi" zang qe Covid-19 nogug; cid' gai: thug' i"?

Gatau ayo, joe" va" mo, we' dakhyo: nug' jhaug' myhi" zang qere: Covid-19 nogug; cid' re gai: thug' ra". Nogug; cid' bin: thug' thao ngad yang: re: zoshao re yomyhi" nug' xo' yang: gai: jhaug' ra" khyo Mungkan: Qao" Zin" Mo, thau: khyo" ta" to" ako". Saoqhid' dalhang bin: thug' mung: shid' lhang: ein: lhang re: su we' dakhyo: yethug' ca" zai ngad:.

22. Xamyid: (common cold/seasonal flu) bin: boe" thao Covid-19 nogug; cid' gai: thug' i"?
Xamyid: Tug'koe" nogug; cid' bin: thug' thao khonho" ba kyo thao she, Covid-19 nogug; cid' thug' gai: i"?

Xamyid: (common cold/seasonal flu) no: na lao" wa Covid-19 nogug; cid' magari: thug' shi:. Xamyid: no gai: shao" byaug lao" she, Covid-19 nogug; cid' yegai: thug' ra".

Xamyid: Tug'koe" nogug; cid' thug' to: lao" wa nang" thao" dadug no: (7 ba) kyo thao she, Covid-19 nogug; cid' gai: thug' ga: ba jhao lam: lang" mo, juyi byid' to" ako".

23. Xamyid: Tug'koe" nogug; cid' thug' to: mung: Covid-19 nogug; cid' mathug' ca" lo: i"?

Xamyid: Tug'koe" nogug; cid' wa Xamyid: Tug'koe" re za: qo" gug byid: zai ngad mung: Covid re maqo" gug nhao ngad: ra". Aira" mathao Covid-19 nogug; cid' thug' qo: ra". Xamyid: Tug'koe" nogug; cid' we' Covid-19 nogug; cid' re nang" thao" dadug no: (7 ba) kyo mung: thug' nae" qhid' mae" ba jhao lam: lang" mo, juyi byid' to" ako".

24. Covid-19 nogug; cid' thug' ra" mae saoghid' lhang we' thao: lhang mocid' mang madau lo: gai: thug' i"?"

Mungkan: Qao" Zin" Mo,thau: wa mocid' mang daja: re za: lhang byang" sho' thug' nae" tau: juyi byid' to" ako". Mocid' mang madau loza: thug' ra" khyo we' tin: yang: mang:din" daqhae: aphyid re qho: ca: na: ra" khyo kad' nan gad yang: re: jab byang" ra" aphyid wa maqo" shi: ngad: ra". La,ma: mae" mocid' mang daja: za" ru magari: qo" lolo" wa Mungkan: Qao" Zin" Mo,thau: aso: zhaug' to" ra" gatau: nogug; cid' re Qao" Zin" Khyo qu" gam mo, we' phyo" qu" yang: thug' gai: ra".

25. Covid-19 nogug; cid' re shid' lhang ein: nae" lhang thug' nae" ayo, mae mathug' boe" ke' lao" wa mang dau: ra" nogug; cid' re khoau: dam: thug' ca" nae"?" (Mng) Mang madau nogug; cid' re khonho" myao" thao re dam: thug' ca" nae"?"

Nogug; cid' nho: akyu" qam: so' byan" sho' qo" nae" tau: ta" to" ra" ayo, mae lhang byang" sho' mocid' mang daja: re za: thug' yu qo: ra". Shid' lhang ein: nae" lhang thug' nae" bana wa mocid' daja: we' daja: madau ngad: ra". Daqhae: wa (21) ba gu: mae thug' ca" mung: daqhae: wa (28) ba mae" (42) ba: agyo: mae thug' ca" ra". Ta" so" to" ra" bana mae thug' lao" wa gug; gam qam" je: gai: qo" ra". Khyo aja: ja" mathao so" to" ra" ayo, lai mung: shid' lhang: ein: lhang re maqo" thug' ke' lao" wa nogug; lhang byang" sho' thug' nae" tau: zai: so: ca". Sin: ang: ra" Qao" Zin" Khyo caung gam byid: mo, we' jho" qham mung: phyad phyad shid' lhang: ein: lhang re thug' yu nae" tau: ba jhao lam: lang" mo, juyi byid' to" ako". Pug; paui khyi tang tang koe, koe, majo, shi: ngad yang: re: nogug; cid' dalhang thug' yu mung: xo' mathug' ra" tho' nogug; cid' shid' lhang: ein: lhang thug' yu: ru wa gaung khyao qo" kham: qam: je: qo" zai ngad: ga: ba jhao lam: lang" mo, myid; jho: to" ako".

26. Covid-19 nogug; cid' shid' lhang bin: thug' to: va" mo, mae re: Covid dam: boe" ru pe" mung: i"?"

Covid-19 nogug; cid' wa gatau: nogug; cid' jham we' dakhyo: za: ngad: ra". Nogug; cid' bin: thug' thao no re gug; gam byid: nae" azhao" joe" nae" nhang" thao" (2) dug,no: myao" ra". La,ma: mae" byu dayaug wa mocid' mathug' shi" au: (mng) nogug; cid' bin: thug' thao (2) dugno: agyo: mae nobug; gau" de; qhug' ngad: re nogug; cid' thug' to: ngad yang: re: no gai: boe" ra".

Khora" nogug; cid' re: no re (100%) maqo" gug; gam byid' ru we' dakhyo: kao – no anhae: - gaung khyo qo" kham: ra" qam: jham mae cao" yang: gug; gam: ra" khyo jham re phyo' mung: bug; gau" de; ra" khyo jham (Breakthrough infection) gai: boe" ra". Nogug; cid' re lhang byan" thug' to: ngad yang: re: nang: phyao: daqhae: wa no gai: gau" de; yu:

ra". Airu re gug; gam: ra" khyo jham re phyo' mung: bug; gau" de; ra" khyo jham (Vaccine breakthrough cases) ga: ta" ako".

27. Covid-19 nogug; cid' shid' lhang bin: thug' to: va" mo, mae Covid' boe" lao" dam: gai: lo thao nogug; cid' dam: thug' ca" nae" i"?"

Nogug; cid' re lhang byang" thug' to: ngad yang: re: nang: phyao: daqhae: wa no gai: gau" de; yu: ra". Airu re gug; gam: ra" khyo jham re phyo' mung: bug; gau" de; ra" khyo jham (Vaccine breakthrough cases) ga: ta" ako". Aiza: mangad: madau: ra" bug; jham mathao re: no gai: gau" de, qhug' ra". Thug' to: va" ra" nogug; cid' mathao qo" kham: ru dajhid' dathao jo, ngad yang: re: bug; vao: laung" rure joe: loe" maqo" gug; gam: ke' mung: yang: re gai: boe" ra". Ngad yang: re: nogug; cid' thug' to: va" mo, mae wa gyai xo sho' no: kham zo" khyo boe" nae" gyai nang" ra".

Ana" yo, joe" nogug; cid' re thao: dalhang dam: thug' ca" ga: Mungkan: Qao" Zin" Mo,thai: mae" ta" ru gatau majo,.

28. Covid-19 nogug; cid' (2) lhang byang" sho' bin: thug' mung: lho" shid' sam khye' myao" thao dam: gai: thug' i"?"

Covid-19 nogug; cid' lhang byang" bin: thug' thao dam: paug' thug' nae" qo maqo we' tin: yang: Mungkan: Qao" Zin" Mo,thai: khyo" ta" lo: ra" khyo pe" majo, shi:. Dam: xo' thug' ca" ga" lo lao" re: Qao" Zin" Khyo caung gam byid: mo, khyo" dam: kyo" lo zai ngad:.

29. Covid-19 nogug; cid' (2) lhang byang" sho' thug' to: va" mo, Covid-19 nogug; cid' gatau dam: gai: paug' thug' i"?"

Korona: bug; (Coronavirus) aja: ja: qhid' mae" – xo sho' no: ru we' shid: ra" ru jham mae" qo" gug; gam sho' ana" lo, qaug aso: zhaug' to" ra" Covid-19 nogug; cid' jham re thug' ca" ra" khyo re: Mungkan: Qao" Zin" Mo,thai: khyo" juyi byid' to" ra". Nogug; cid' daja: re tu" ka" to" ra" ayo, mae lhang byang" bin: thug' lao" wa gatau nogug; cid' jham dam gai: paug' thug'.

Maca" qo lo: nogug; cid' dam: paug' thug' ra" mathao nogug; cid' gaigai qo ca" na mo, qhid' mae" ca" qo: byaug; ra" khyo – nogug; cid' nyang sho' maqo" thug' byaug; ra" khyo – no gau" de; ra" khyo jham re tam" pyid' ra" mau" mae aqug; aqae" boe" nhao: ra" khyo jham gai: boe" ra" mathao nogug; cid' lhang byang" bin: thug' lao" wa dam: paug' thug' ra" khyo jham re jao" lha" ca" zai ngad: ra".

Nogug; cid' (2) lhang byang" sho' thug' to: thao gatau: nogug; cid' daja: re qam: pyang" dam: paug' thug' ra" khyo re Mungkan: Qao" Zin" Mo,thai: khyo" juyi byid' to" ra" khyo jham majo, shi:. Mangdin" myo: sho' mae ca: qho: qu" na" ra" azhao" shi" angad:.

(3) lhang ein: lhang nogug; cid' qam: pyang" thug' ru we' tin: yang: mangdin" mae cao" yang: nogug; cid' we' tin: yang: myao jheim majho" dau: ru gai: jo, ngad yang: re: myaung: ra" mangdin" mae na: ra" mo, re: nogug; cid' qo" thug' yu nae" shi" akhyag to: qo" zai: so: nae" qhid' mae" (3) lhang ein: lhang nogug; cid' thug' ra" akhyo jham re zai: so: nae" madau shi: ngad: ra" khyo Mungkan: Qao" Zin" Mo,thai: khyo" mho' vhao" to" ra"

Ngha: Ra" Mug,sug' jham

WHO: Novel Coronavirus-2019 - Questions and Answers

CDC: Coronavirus – Frequently Asked Questions (FAQ)

UNICEF: Novel Coronavirus – FAQ

UK National Health Service – Covid-19 Vaccine

Serum Institute: FAQ – Covishield

SOP of AstraZeneca_Storage and Thawing Use